



KERAJAAN MALAYSIA

PEKELILING PERKHIDMATAN BILANGAN 3 TAHUN 2019

BANTUAN KHAS KEWANGAN TAHUN 2019

TUJUAN

1. Pekeliling Perkhidmatan ini bertujuan melaksanakan keputusan Kerajaan untuk memberi Bantuan Khas Kewangan sempena Hari Raya Aidilfitri tahun 2019 kepada pegawai Perkhidmatan Awam Persekutuan.

LATAR BELAKANG

2. Kerajaan telah memutuskan supaya Bantuan Khas Kewangan Tahun 2019 dibayar kepada pegawai Perkhidmatan Awam Persekutuan di Gred 56 dan ke bawah sebanyak RM450.00 dan turut dipanjangkan kepada pesara Kerajaan yang menerima pensen sebanyak RM225.00.

3. Pekeliling Perkhidmatan ini adalah bagi maksud menjelaskan mengenai kaedah pelaksanaan Bantuan Khas Kewangan Tahun 2019.

PELAKSANAAN

4. Bantuan Khas Kewangan Tahun 2019 sebanyak RM450.00 diberi kepada pegawai Perkhidmatan Awam Persekutuan di Gred 56¹ dan ke bawah dengan syarat bahawa pegawai masih berkhidmat sehingga 24 Mei 2019 dan berada dalam perkhidmatan sekurang-kurangnya 30 hari berturut-turut dalam tempoh 1 Januari 2019 hingga 24 Mei 2019.

5. Tempoh 30 hari berturut-turut adalah termasuk semua jenis cuti bergaji penuh, semua jenis cuti separuh gaji, semua jenis cuti tanpa gaji, Hari Rehat Mingguan, Hari Kelepasan Mingguan dan Hari Kelepasan Am dalam tempoh 1 Januari 2019 hingga 24 Mei 2019.

PEGAWAI YANG LAYAK

6. Tertakluk kepada perenggan 4 dan 5 di atas, pegawai yang layak diberi Bantuan Khas Kewangan Tahun 2019 adalah seperti berikut:

- 6.1 pegawai lantikan tetap, sementara dan *contract of service*²;
- 6.2 pegawai yang bercuti bergaji penuh;
- 6.3 pegawai yang bercuti separuh gaji;
- 6.4 pegawai yang bercuti tanpa gaji; dan
- 6.5 pegawai yang dipinjamkan termasuk ke agensi yang diasingkan pengurusan saraannya. Bantuan Khas ini akan dibayar oleh agensi yang menerima peminjaman pegawai.

¹ Pegawai di Gred 56 atau setara. Tidak termasuk pegawai yang sedang memangku di Gred Utama/Khas.

² Bagi pegawai di bawah *contract for service*, surat edaran berasingan akan dikeluarkan oleh Kementerian Kewangan.

7. Bantuan Khas Kewangan Tahun 2019 juga dipanjangkan kepada:
 - 7.1 guru interim;
 - 7.2 pemandu yang dilantik sendiri oleh pegawai Gred Jawatan Utama B dan ke atas, serta Gred Khas A dan ke atas yang layak pemandu tetapi tidak disediakan pemandu oleh jabatannya; dan
 - 7.3 pemandu yang dilantik sendiri oleh Anggota Pentadbiran dan Hakim dan Pesuruhjaya Kehakiman berdasarkan Akta Ahli Parlimen (Saraan) 1980 dan Akta Saraan Hakim 1971.

PEGAWAI YANG TIDAK LAYAK

8. Pegawai yang tidak layak diberi Bantuan Khas Kewangan Tahun 2019 adalah:
 - 8.1 pegawai yang dikenakan hukuman tatatertib dalam tempoh 1 Januari 2019 hingga 24 Mei 2019;
 - 8.2 pegawai yang ditamatkan perkhidmatan demi kepentingan awam dalam tempoh 1 Januari 2019 hingga 24 Mei 2019; dan
 - 8.3 pegawai yang meletak jawatan dalam tempoh 1 Januari 2019 hingga 24 Mei 2019.

PEGAWAI YANG DITANGGUHKAN BANTUAN KHAS KEWANGAN

9. Pegawai yang ditahan kerja, digantung kerja atau surat pertuduhan telah dikeluarkan oleh Pihak Berkuasa Tatatertib ditangguhkan Bantuan Khas Kewangan Tahun 2019 ini. Pegawai hanya layak diberi Bantuan Khas Kewangan Tahun 2019 sekiranya Pihak Berkuasa Tatatertib mendapati pegawai tersebut tidak bersalah.

PEKERJA SAMBILAN HARIAN (PSH)

10. Bantuan Khas Kewangan Tahun 2019 sebanyak RM450.00 dipanjangkan kepada PSH yang masih berkhidmat pada 24 Mei 2019 dengan syarat tempoh kontraknya telah berkuat kuasa sekurang-kurangnya 30 hari berturut-turut dalam tempoh 1 Januari 2019 hingga 24 Mei 2019.

PESARA

11. Bantuan Khas Kewangan Tahun 2019 kepada pesara Kerajaan yang menerima pencen dan penerima pencen terbitan pada atau sebelum 24 Mei 2019 di bawah undang-undang pencen akan dibayar sebanyak RM225.00 oleh Jabatan Perkhidmatan Awam.

12. Pesara yang dilantik semula secara *contract of service* dan masih berkhidmat pada 24 Mei 2019 layak diberi Bantuan Khas Kewangan Tahun 2019 sebanyak RM450.00 tertakluk memenuhi syarat berkhidmat sekurang-kurangnya 30 hari berturut-turut dalam tempoh 1 Januari 2019 hingga 24 Mei 2019. Pembayaran sebanyak RM225.00 akan dibuat oleh Jabatan Perkhidmatan Awam dan bakinya sebanyak RM225.00 akan dibayar oleh jabatan di mana pegawai sedang berkhidmat.

PEGAWAI MENINGGAL DUNIA DALAM PERKHIDMATAN

13. Pegawai Perkhidmatan Awam Persekutuan yang meninggal dunia pada 24 Mei 2019 layak diberi Bantuan Khas Kewangan Tahun 2019 sebanyak RM450.00 dengan syarat pegawai telah berada dalam perkhidmatan sekurang-kurangnya 30 hari berturut-turut dalam tempoh 1 Januari 2019 hingga 24 Mei 2019. Pembayaran kepada mana-mana penerima pencen terbitan yang layak di bawah undang-undang pencen sebanyak RM225.00 akan dibuat oleh Jabatan Perkhidmatan Awam dan bakinya sebanyak RM225.00 akan dibayar oleh jabatan terakhir pegawai berkhidmat.

TARIKH PEMBAYARAN

14. Bantuan Khas Kewangan Tahun 2019 ini akan dibayar pada 24 Mei 2019.

TANGGUNGJAWAB PEMBAYARAN

15. Pembayaran Bantuan Khas Kewangan Tahun 2019 ini adalah menjadi tanggungan jabatan di mana pegawai berkhidmat pada tarikh pembayaran.


TARIKH KUAT KUASA

16. Pekeliling Perkhidmatan ini berkuat kuasa mulai tarikh ia dikeluarkan.

PEMAKAIAN

17. Tertakluk kepada penerimaan pakai Pekeliling Perkhidmatan ini oleh pihak berkuasa masing-masing, peruntukan Pekeliling Perkhidmatan ini pada keseluruhannya dipanjangkan kepada semua Perkhidmatan Awam Negeri, Pihak Berkuasa Berkanun dan Pihak Berkuasa Tempatan.

“BERKHIDMAT UNTUK NEGARA”



(DATUK SERI BORHAN BIN DOLAH)
Ketua Pengarah Perkhidmatan Awam
Malaysia.

JABATAN PERKHIDMATAN AWAM
MALAYSIA
PUTRAJAYA

17 Mei 2019

Semua Setiausaha Suruhanjaya Perkhidmatan
Semua Ketua Setiausaha Kementerian
Semua Ketua Jabatan Persekutuan
Semua YB Setiausaha Kerajaan Negeri
Semua Pihak Berkuasa Berkanun
Semua Pihak Berkuasa Tempatan